

REXISTRO XERAL DO VALEDOR DO POBO
SANTIAGO DE COMPOSTELA
Data: 28/12/2018 12:59:49
SAIDA 16577/18

Sr. alcalde-presidente do Concello do Vicedo
Travesía da Mariña, 57
27860 - O Vicedo (Lugo)

Reclamante: [REDACTED]
Expediente. Nº RSCTG 00129/2018

Correo electrónico: [REDACTED]

ASUNTO: Resolución da Comisión da Transparencia de Galicia na reclamación presentada ao amparo da disposición adicional quinta da Lei 1/2016, do 18 de xaneiro, de transparencia e bo goberno

Vista a reclamación presentada por [REDACTED] mediante escrito do 5 de novembro de 2018, a Comisión da Transparencia, considerando os antecedentes e fundamentos xurídicos que se especifican a continuación, adopta a seguinte resolución:

ANTECEDENTES

Primeiro. [REDACTED], presentou, mediante escrito que tivo entrada no rexistro do Valedor do Pobo o día 5 de novembro de 2018, unha reclamación ao amparo do disposto na disposición adicional quinta da Lei 1/2016, do 18 de xaneiro, de transparencia e bo goberno, por entender desestimada por silencio administrativo unha solicitude de acceso á información dirixida ao Concello de O Vicedo, sobre o contrato ou outro documento polo que a Corporación Local de O Vicedo pode utilizar os baixos do edificio Praza situado na rúa Francisco Vilasuso, 1 do Vicedo (Lugo).

O reclamante solicitou a información con data do 16 de agosto de 2018, ratificada con data do 25 de setembro do mesmo ano, sen ter obtido resposta.

O escrito viña acompañado de copia das solicitudes e xustificante de entrega mediante burofax.

Segundo. Con data do 7 de novembro de 2018 déuselle traslado da documentación achegada polo reclamante ao Concello de O Vicedo para que, en cumprimento da normativa de transparencia, achegase informe e copia completa e ordenada do expediente.

A recepción da solicitude pola administración foi o 11 de novembro de 2018.

Terceiro. Con data do 23 de novembro de 2018, tivo entrada no Rexistro do Valedor do Pobo, oficio do Concello de O Vicedo no que remite copia do expediente e informa que a Xunta de Goberno Local, acordou informar á Comisión de Transparencia de Galicia que o Concello do Vicedo ven utilizando os baixos do inmovible no 1 da rúa Francisco Vilasuso do Vicedo "en precario", polo que, en ningún caso, se puido denegar ó interesado, [REDACTED] o acceso ó contrato ou calquera outro documento que viñera posibilitando a utilización do referido inmovible pola Corporación local, porque non existe.

FUNDAMENTOS XURÍDICOS

Primeiro. Competencia e normativa

O artigo 24 da Lei 19/2013, do 9 de decembro, de transparencia, acceso á información pública e bo goberno, de carácter básico na súa práctica totalidade, establece que contra toda resolución expresa ou presunta en materia de acceso á información, poderá interpoñerse unha reclamación ante o *Consejo de Transparencia y Buen Gobierno*, con carácter potestativo e previa a súa impugnación en vía contencioso-administrativa. Esa mesma lei, na súa disposición adicional cuarta, establece que a resolución da reclamación prevista no artigo 24 corresponderá, nos supostos de resolucións ditadas polas Administracións das Comunidades autónomas e o seu sector público, e polas Entidades Locais comprendidas no seu ámbito territorial, ao órgano independente que determinen as Comunidades Autónomas.

O artigo 28 da Lei 1/2016, do 18 de xaneiro, de transparencia e bo goberno, establece que contra toda resolución expresa ou presunta en materia de acceso á información pública, poderá interpoñerse unha reclamación perante o Valedor do Pobo, correspondendo á Comisión da Transparencia, de acordo co disposto no artigo 33, a resolución das ditas reclamacións.

A disposición adicional quinta da lei 1/2016, do 18 de xaneiro establece que a competencia para resolver esas reclamacións corresponderá, no suposto de resolucións ditadas polas entidades locais de Galicia, ao Valedor do Pobo, ao que se adscribe a Comisión da Transparencia, que por tanto é a competente.

Segundo. Procedemento aplicable

O artigo 28.3 da citada Lei 1/2016 establece que o procedemento de reclamación se axustará ao previsto nos parágrafos 2, 3, e 4 do artigo 24 da Lei 19/2013, que establece que as reclamacións contra resolucións en materia de acceso á información, que ten carácter potestativo e previo á impugnación en vía contencioso-administrativa, axustarán a súa tramitación ao disposto na lexislación de procedemento administrativo común en materia de recursos.

Terceiro. Dereito de acceso á información pública

A lei 1/2016, de 18 de xaneiro, recoñece no seu art. 24 o dereito de todas as persoas a acceder á información pública, entendida esta como os contidos ou documentos, calquera que sexa o seu formato ou soporte, que consten en poder dalgún dos suxeitos incluídos no ámbito de aplicación desta lei e que fosen elaborados ou adquiridos en exercicio das súas funcións, do mesmo xeito que a definición contida no artigo 13 da Lei estatal 19/2013 que ten carácter básico.

O concepto de información pública e o dereito de acceso á mesma se configuran de forma ampla tanto na normativa autonómica como na estatal. Os titulares do dereito son todas as persoas, sen que o solicitante estea obrigado a motivar a súa solicitude de acceso á información (art. 26.4 Lei 1/2016, de 18 de xaneiro).

O obxecto da lei 19/2013, é ampliar e reforzar a transparencia da actividade pública e regular e garantir o dereito de acceso a información relativa a aquela actividade (art. 1). No seu preámbulo sinala que a transparencia, o acceso á información pública e as normas de bo goberno deben ser os eixos fundamentais de toda acción política e só cando a acción dos responsables públicos se somete a escrutinio, cando os cidadáns poden coñecer como se toman as decisións que lles afectan, como se manexan os fondos públicos ou baixo que criterios actúan as nosas institucións se pode falar do inicio dun proceso no que os poderes públicos comezan a responder a unha sociedade que é crítica, esixente e que demanda participación dos poderes públicos.

Pola súa banda, a Lei galega 1/2016, sinala na súa Exposición de Motivos que a crecente exixencia cidadá de control público da actuación das administracións aconsella a aprobación dunha norma que supera os anteriores estándares e que se concreta nun texto legal que establece esixencias engadidas de transparencia e acceso á información pública.

Cuarto. Prazo para a interposición do recurso

O artigo 28.3 da Lei 1/2016, establece que o procedemento das reclamacións fronte ás resolucións en materia de acceso á información pública axustarase ao previsto no artigo 24 da Lei 19/2013.

O artigo 24 da Lei 19/2013 establece que fronte a toda resolución expresa ou presunta en materia de acceso a información poderá interpoñerse unha reclamación con carácter potestativo e previo á súa impugnación na vía contencioso-administrativa.

Esta reclamación interporase no prazo dun mes a contar desde o día seguinte ao da notificación do acto impugnado ou dende o día seguinte a aquel no que se produzan os efectos do silencio administrativo.

Tal e como establece o Criterio Interpretativo 1/2016, do Consejo de Transparencia y Buen Gobierno, de acordo con reiterada doutrina xurisprudencial e coas previsións normativas contidas nos artigos 122 e 129 da Lei 39/2015, poderanse interpoñer recursos de alzada e reposición, respectivamente, respecto de resolucións presuntas en calquera momento fronte a actos que non sexan expresos.

De acordo co anterior, e dado que no presente caso a Administración non resolveu expresamente, debe admitirse a reclamación presentada por estar en prazo.

Quinto. Análise do expediente

O recurso substitutivo presentado ante a Comisión da Transparencia por [REDACTED] deriva da falta de resposta por parte do Concello de O Vicedo á súa solicitude de que se lle facilite información sobre o contrato ou outro documento polo que a Corporación Local de O Vicedo pode utilizar os baixos do edificio Praza situado na rúa Francisco Vilasuso, 1 do referido concello. O Concello no informe remitido á Comisión, comunica que ven utilizando os baixos do referido inmovible "en precario", polo que non existe contrato ou calquera outro documento que viñera posibilitando a utilización do referido inmovible pola Corporación local, e dado que non existe ningún tipo de documento, non se denegou ao interesado a información solicitada.

No presente caso, a información que tiña o Concello que ter facilitado ao solicitante, é a inexistencia de contrato ou calquera outro documento que veña posibilitando a utilización do referido inmovible pola Corporación local. O feito de que o Concello este a utilizar o referido local en precario, é unha información pública que debeu ser remitida ao solicitante, polo que procede a estimación do presente recurso, por ter o solicitante, de acordo co disposto no artigo 24 da Lei 1/2016, dereito ao acceso á mesma.

O Concello de O Vicedo non resolveu a solicitude de acceso á información do [REDACTED] polo que debe lembrárselle que, de acordo co disposto no artigo 20.6 da Lei 19/2013, o incumprimento reiterado da obrigaón de resolver en prazo ten a consideración de infracción grave para os efectos da aplicación aos responsables do réxime disciplinario previsto na correspondente normativa reguladora.

En base aos feitos e fundamentos de dereito anteriormente expresados, a Comisión da Transparencia

ACORDA

Primeiro: Estimar a reclamación presentada por [REDACTED] contra a denegación por silencio administrativo, da súa solicitude de información sobre o contrato ou outro documento polo que a Corporación Local de O Vicedo pode utilizar os baixos do edificio Praza situado na rúa Francisco Vilasuso, 1 do referido Concello.


Segundo: Instar ao Concello de O Vicedo a que, no prazo máximo de 15 días hábiles, se responda á petición de información solicitada mediante a remisión da mesma, respectando os límites dos artigos 14 e 15 da Lei 19/2013, do 9 de decembro, e o artigo 22 da mesma lei, no que fai á formalización do acceso.

Terceiro: Instar ao Concello de O Vicedo a que, no prazo máximo de 15 días hábiles, remita a esa Comisión da Transparencia copia do envío da información solicitada polo reclamante.

Contra esta resolución, que pon fin á vía administrativa, unicamente cabe interpoñer recurso contencioso-administrativo no prazo de dous meses, de conformidade co previsto no artigo 8.3 da Lei 29/1998, do 13 de xullo, reguladora da xurisdición contencioso-administrativa.

Santiago de Compostela, a 19 de decembro de 2018

A presidenta da Comisión da Transparencia



Milagros Otero Parga